

## Naqqiut

Siunnersuut 15. august 2017-imeersoq taarserpaa

### Tunngavilersuut

Naqqiummi arlalinnik allannguuteqarpoq, pingaartumik inatsisip oqaasertaani nassuiaatitaanilu erseqqissaaneruset inatsisilerinermilu piumasaqaatinut attuumassuteqartut. Allannguinnermut ilaatigut pissutaavoq Inatsisartut Allattoqarfiata inatsisissamik msiissuina. Inatsisip oqaasertaani ialatigut § 1, imm. 3-p, § 3, imm. 3-p, § 5-7-ip, § 15-ip, § 26, imm. 2-p aamma § 32-p oqaasertai iluarsineqarput. Siunnersuummi § 10-p atuuffissaa (Kalaallit Nunaanni ingerlatseqatigiiffinni aningaasatigut piginneqataassutinut akileraarutit annikinneruset) killilerneqarpoq, taamaalilluni ingerlatseqatigiiffinni børsimi nalunaarsorneqartuni Kalaallit Nunaannilu angerlarsimaffeqartuni aktiat aalajangersakkami aamma ilaatinneqalerlutik. Kukkunersuisup akileraartarnermilu ingerlatsiviup suliassatigut artukkerneqarnerat eqqarsaatigalugu aktiat nalunaarsorneqanngitsut pillugit nammineq nalunaarsukkamik tunniussinissamut piffissaliunneqartoq ulloq 1. juli 2019-imit 1. j anuar 2020-mut sivitsorneqarpoq.

**Siunnersuut uunga: Ingerlatsivinni pigisanit aamma pappiaqqat nalillit ilaannit inuit iluanaaruteqartarnerannit aamma annaasaqartarnerannit akileraartarnermi suliassat pillugit Inatsisartut Inatsisaat (pappiaqqat nalillit iluanaarutigineqartarnerat pillugu inatsit)**

### Kapitali 1

#### *Atuutsinneqarfia*

§ 1. Aktianit iluanaarutit aamma annaasaqartarnerit Inatsisartut Inatsisaat manna naapertorlugu suliarineqartarput.

*Imm. 2.* Inatsisartut Inatsisaanni aktiat pillugit maleruaqqusat taamatuttaaq aktianik atsiorsinnaatitaanermut aamma aktianik piginneqataassutaasunut atsiorsinnaatitaanermut, anpartsselskabini piginneqataassutinut, piginneqataaannermut uppernarsaatinut aamma aningaasaliisarnermi peqatigiiffinni uppernarsaatinut nioqqutigineqarsinnaasunut tunngatillugu atuupput.

*Imm. 3.* Inatsisartut Inatsisaanni aktiat pillugit maleruaqqusat taamatuttaaq obligationinut nioqqutigineqarsinnaasunut atuupput.

§ 2. Iluanaarutit aamma annaasaqaatit tunniussinermut imaluunniit pissarsiassarisanit akiliinnermut atatillugu Inatsisartut Inatsisaanni matumani maleruaqqusat naapertorlugit suliarineqassapput.

*Imm. 2.* Pissarsiassarisat pineqartut tassaapput obligationit, naalagaaffiup taarsigassarsiaanun uppernarsaatit, pappiaqqanut nalilinnut ukioq ataaseq inorlugu atuuttussaasunut

uppernarsaatit, suliffeqarfiit taarsigassarsiannut uppernarsaatit aamma qularnaveeqqusiussaqaarluni taarsigassarsinermi allagartat illumut qularnaveeqqutaasut.

**§ 3.** Inatsisartut Inatsisaat aktiatigut aamma piginneqataassutitigut (anpartit) iluanaarutitut aamma annaasaqaatitut atuutinngilaq, akileraartartup inuussutissarsiutaanut attuumassuteqartunut tak. aningaasarsianit akileraarutit pillugit Inatsisartut Inatsisaanni § 34, imm. 1, normu 2, tassani akileraarnissamut pisussaaffik aningaasarsianit akileraarutit pillugit inatsimmi maleruaqqusat nalinginnaasut naapertorlugit nalunaarsorneqarnerani.

*Imm. 2.* Inatsisartut Inatsisaat Ingerlatseqatigiiffiup aktianik sulisunut allanut nioqputigeqqinnissaat siunertaralugu utertitsilluni pisineranut Inatsisartut inatsisaat atuutinngilaq, tak. aningaasarsianit akileraarutit pillugit Inatsisartut Inatsisaat § 87, imm. 1-2.

*Imm. 3.* Aktianit, illumik piginneqataassutinit pappiaqqanillu nalilinnit allanit tunisinermi iluanaarut aamma annaasaqaat, inissiamik inigisamik illumi arlalinnik inigineqartussanik inissiaqarfiusumi atuisinnaanermut attuumassuteqartoq, akileraaruteqanngilaq, imaappat inissiaq pappiaqqamik nalilimmik piginnittumut imaluunniit taassuma inoqutigiittut ilaqaatanut piffissap ilaani imaluunniit piffissaq tamakkerlugu, pappiaqqamik nalilimmik piginnittuuffigisimasaani.

**§ 4.** Iluanaarutit aamma annaasaqaatit aktieselskabit il.il. unitsinneqarneranni agguaassinermi pissarsiarisat qaammatsiutit malillugit ukiumi tassani ingerlatsiviup il.il. atorunnaarsivinneqarfiani, suliarineqassapput § 11-17 naliliutinik tunisinermi akileraarusiinermi maleruaqqusat naapertorlugit, taamaattorli tak. imm. 2.

*Imm. 2.* Aktianik amerlanernik piginnittoq ingerlatsivimmik atorunnaarsitsisoq naliliutinillu ingerlatsivimmut allanut tunisaqarsimasoq, tassani aammattaq pineqartoq aktianik amerlanernik piginnittuulluni, aningaasarsianit akileraarutit pillugit Inatsisartut Inatsisaanni § 86, imm. 2 naapertorlugu akileraartinneqassaaq.

**§ 5.** Aktiat børsini aktianik niuerfinni nalunaarneqarsimasut tassaapput pappiaqqanik aningaasanik nalilinnik niuerneq il.il. pillugu inatsimmi Kunngip peqqussutaatigut Kalaallit Nunaannut atuutsinneqartumi nassuiaatigineqartutut niuerfinni nioqputigineqartartut pisiarineqartartullut.

**§ 6.** Akileraaruteqartartoq pappiaqqanik nalilinnik nalunaarsuiffimmi fondskodeqatigiittut nalunaarneqarsimasunik imaluunniit assigiimmik atugassaqartitaallutik pilersitsisumit ataatsimit pilersinneqarsimasunik pissarsiassaqaqpat siulliullugit pissarsiarisimasat siullugit tunineqartutut isigineqassapput.

**§ 7** Kalaallit aktiaataattut isigineqarput ingerlatseqatigiiffinni Kalaallit Nunaanni angerlarsimaffeqartuni aktiaatit piginneqataassutilluunniit.

## **Kapitali 2**

### *Akilaraartussatut pineqartut*

§ 8. Inatsimmut ilaatinneqarput inuit aningaasarsianit akilaraarutit pillugit Inatsisartut Inatsisaanni § 1 aamma § 2 naapertorlugu akilaraartussaataasut.

## **Kapitali 3**

### *Iluanaarutinit akilaraarusiineq*

§ 9. Aktianit iluanaarutinit aamma pissarsiassarisanit akilaraarutit naatsorsorneqassapput akilaraarutissaviit naatsorsorneqassapput katillugit akilaraarutissat procentiannik aalajangersakkamik, tak. aningaasarsianit akilaraarutit pillugit Inatsisartut Inatsisaanni §§ 61-63, tassa akilaraartarput kommunitim akilaraarfissaani atuuttumik, tak. aningaasarsianit akilaraarutit pillugit Inatsisartut Inatsisaanni § 68.

§ 10. Kalaallit aktiaataannit iluanaarutinit akilaraarutissaq akilaraarutissavittut naatsorsorneqassaaq akilaraarutip annertussusianik ukiuni isertitaqarfiusuni 2019-imi aamma 2020-mi 15 procentimik annertussusilimmik.

*Imm. 2.* Ukiuni isertitaqarfiusuni tullinnguuttuni annertussuseq Inatsisartunit aalajangersarneqassaaq, aningaasarsianit akilaraarutit pillugit Inatsisartut Inatsisaanni § 61, imm. 2-imi aalajangersaasarneq assigalugu.

## **Kapitali 4**

### *Pissarsiassarisanit iluanaarutit aamma annaasaqaatit naatsorsorneqarnerat*

§ 11. Pissarsiassarisat tunniunneranni imaluunniit utertillugit akilernerisigut iluanaarutit imaluunniit annaasaqaatit naatsorsorneqassapput. Pissarsiassatigut iluanaarut imaluunniit annaasaqaat naatsorsorneqassaaq pisiarinerini akiliutigineqartut aamma tunniussinermi imaluunniit utertillugit akiliinermi akigineqartut nikingassutaattut. Imaappat utertillugit akiliineq naafferaalluni ingerlanneqarluni taava iluanaarutit imatut naatsorsorneqassapput, naafferaalluni utertitsilluni akiliinerni ataasiakkaani tamani procentip ilaa ima annertutigisog naatsorsuinermi ilanngunneqassaaq, taassuma assigalugu procentit amerlaqatai nalingata 100-p pisiarinerani nalinganik qaangiissutigisaa.

§ 12. Pissarsiassarisanit annaasaqaatit ilanngaatigineqarsinnaapput § 15-imi maleruaqqusat naapertorlugit.

## Kapitali 5

*Aktiatigut il.il. iluanaarutininik aamma annaasaqaatinik naatsorsuineq*

*Naliliutinik tunisinermi akileraarusiineq*

**§ 13.** Aktianit iluanaarutininik aamma annaasaqaatinik akileraarusiisoqassaaq kapitalimi matumani maleruaqqusat naapertorlugit. *Imm. 2.* Iluanaarutit aamma annaasaqaatit agguaqatigiissitsinermi periaaseq napertorlugu naatsorsorneqassapput, tassa imaappoq aktiat pineqartut tunniunneqarneranni akiata aamma pisiarineqarneranni akiata assigiinngissutaattut. Pisiarineqarneranni nalingat imatut paasineqassaaq aktiaatigisat tamakkerlugit pisiarineqarneranni nalingattut, tassa akileraaruteqartup ingerlatsivimmi pineqartumi pigisai, tassani apeqqutaatinagu assigiinngitsunik pisussaassuseqarnerat.

**§ 14.** Piginneqataassutit (anpartit) aamma aningaasaliissuteqartarnermut peqatigiiffinni, aningaasaliissuteqartarnermut ingerlatsivinni il.il. aningaasaliisimanermut uppersaatait il.il. naliliutinik tunisinermi akileraarusiineq § 13, imm. 2-miittoq naapertorlugu akileraaruserneqassapput.

*Annaasaqaatit*

**§ 15.** Aktiaatinikt børsini nalunaarsorneqarsimasunik tunniussinermi annaasaqaatit aamma tunniussinermi imaluunniit pissarsiassarisanit utertitsinermi akiliinermut atatillugu annaasaqaatit ukiup aningaasarsiorfiusup katinnerannit ilanngaatigineqarsinnaapput isertitanit makkuninnga:

- 1) Aktianik børsini nalunaarsorneqarsimasunik tunniussinermi iluanaarutinit
- 2) Inatsisartut Inatsisaat manna naapertorlugu tunniussinermi imaluunniit pissarsiassarisanit utertilluni akiliinermut atatillugu iluanaarutinit.
- 3) Piginneqataassutinik (anpartit) aamma aningaasaliissuteqartarnermut peqatigiiffinni uppersaataatinik § 14-imi ilaatinneqartunik tunniussinermi iluanaarutinit.

*Imm. 2.* Ilanngaaseereerluni annaasaqaatit ukiunut aningaasarsiorfiusunut tulliuuttunut 10-inut ilanngaaseereerluni iluanaarutinit, imm. 1, normu 1-2 naapertorlugit ilanngaatigisassanngorlugit saqqummiunneqarsinnaapput. Taamaattorli piffissap taasuma iluani ilanngaat taamaallaat ukiumut aningasarsiorfiusumut kingusinnerusumut nuunneqarsinnaavoq, imaappat ukiumi siuliani iluanaarutinit matussuseqarsinnaasimanani.

*Imm. 3.* Ingerlatsivinnit pissarsiassarisanit annaasaqaatit taakkunani akileraaruteqartartoq sunniuteqarluni imaluunniit sunniuteqarsimalluni soorlu aningaasarsianit akileraarutit pillugit Inatsisartut Inatsisaanni § 86, imm. 3-mi taaneqartutut, imaluunniit pissarsiassarisanit annaasaqaruni katissimalluni aapparissamigut, angajoqqaamigut aamma aanaakumigut/aataakumigut aammattaq qitornamigut ernuttamigut aamma taakku

katissimallugit apparisaatigut imaluunniit toqukku qimagaanermi pigisatigut inunnit taaneqartutigit tamakku ilanngaatigineqarsinnaanngillat. Qitornassamut aamma qitornavissiaqarnermut tunngasut pissusissamisoorutut ilaqutariissutsimut tunngasunut sanilliunneqassapput.

*Imm. 4.* Pissarsiassarisanit annaasaqaatit ilanngaatigineqarsinnaanngillat imaappat pissarsiassarisanit erniatigut isertitat imaluunniit pissarsiassarisanit iluanaarutit Inatsisartut Inatsisaanni matumani ilaatinneqartut, marloriaammik akileraartussaagaluarnaq pillugu isumaqatigiissuteqarnerup kingunerisaanik akileraaruteqartartup isertitaanik naatsorsuineranut ilaatinneqartussaanngippata.

*Imm. 5.* Aktiatigut annaasaqaatit, taakku pissarsiarineqarnermik nalaani akileraaruteqartartumut børsini nalunaarsorneqarsimappata, kisianni niuerfimmi malittarisassaliorneqarsimasumik niuerutigineqarunnaarlutik, tak. § 13, soorlu assarsuutigalugu aktia niuerfimmiit peerneqarsimappat imaluunniit atorunnaarsinneqarsimappat, taamaallaat iluanaarutini ilanngaatigineqarsinnaavoq § 15, imm. 1, nr. 1-2-mi aalajangersakkat malillugit.

**§ 16.** Aktiatigut nalunaarsorneqarsimanngitsutigit annaasaqaatit, taamaattorli tak. § 17, aktiatigut nalunaarsorsimanngitsutigit allatigut iluanaarutinit ukiumi tassani aningaasarsiorfiusumi ilanngaatigineqarsinnaapput.

*Imm. 2.* Ilanngaaseereerluni annaasaqaatit ukiunut aningaasarsiorfiusunut tulliuttunut 10-inut ilanngaaseereerluni iluanaarutinit aktianit nalunaarsorsimanngitsunit tunisinermi akileraaruserneqarsimasunit ilanngaatigisassanngorlugit saqqummiunneqarsinnaapput. Taamaattorli piffissap taasuma iluani ilanngaat taamaallaat ukiumut aningasarsiorfiusumut kingusinnerusumut nuunneqarsinnaavoq, imaappat ukiumi siuliani iluanaarutinit matussuseqarsinnaasimanani.

**§ 17.** Kalaallit aktiataannit tunniussinermi annaasaqaatit kalaallit aktiataannit allanit iluanaarutinit ukiumi tassani aningaasarsiorfiusumi ilanngaatigineqarsinnaapput.

*Imm. 2.* Kalaallit aktiataannit ilanngaaseereerluni annaasaqaat ukiunut aningaasarsiorfiusunut tulliuttunut 10-inut ilanngaaseereerluni iluanaarutinit ilanngaatigisassanngorlugit saqqummiunneqarsinnaapput. Taamaattorli piffissap taasuma iluani ilanngaat taamaallaat ukiumut aningasarsiorfiusumut kingusinnerusumut nuunneqarsinnaavoq, imaappat ukiumi siuliani iluanaarutinit matussuseqarsinnaasimanani.

## **Kapitali 6**

### *Pissarsineq aamma tunniussineq*

#### *Tunniussineq*

**§ 18.** Inatsisartut Inatsisaanni matumani tunniussineq imatut paasineqassaaq tunisineq, taarsiineq, atorunnaarsitsineq aamma allatut iliornikkut piginnikkunnaarneq.

*Imm. 2.* Aktianik pissarsineq aamma tunniussineq tunissutigalugit imaluunniit kingornullugit tamanna Inatsisartut Inatsisaanni matumani pisiarinninnermut taamatuttaarlu nioqqutiginninnermut saniliunneqarput. Pisiarinerani akiatut imaluunniit tunniussinermi akiatut taamatut pisoqartillugu pineqarput aningaasat, Inatsisartut Inatsisaat manna naapertorlugu pissarsinnermut pineqartumut akileraarnissamut naatsorsuinnermut tunngaviusut. Taanna akileraassutaasussaasimangippat aktiap pineqartup tunniunneqarnerata nalaani niuerutigineqarnermini nalinga pisiarinerani akiatut imaluunniit tunniussinermi akiatut isigineqassaaq. Maleruaqqusat naggatini 1-3-miittut atuutinngillat imaattoqarpat pissarsiaqartoq tunniussisup akileraartussatut inissisimaneranut ilannguppat.

*Imm. 3.* Taarsiinissamut imaluunniit sillimmasiinnermut akigitinneqartut tunniussinermi akinut naligiisinneqassapput.

### *Kingoraarsisinnaaneq atorlugu tunniussineq*

**§ 19.** Akileraartartup toqukkut qimagunneranut ataatillugu katissimallugu aapparisaq sivilunerusumik inuusup ataatsimoorlutik pigisaminnik piginnittuuneq kingornussassaasunik agguaassinertaqanngitsumik nangippagit, taava Inatsisartut Inatsisaat manna naapertorlugu sivilunerusumik inuusooq toqukkut qimaguttup akileraartartutut inissisimaffianut inississaaq.

**§ 20.** Aktiat ingerlatsiviup aningaasaliissuteqartup aktiaataanik kattunnermut imaluunniit avissaarnermut atatillugu inuup akissarsiatut pissarsiai, aningaasarsianit akileraarutit pillugit Inatsisartut Inatsisaanni kapitali 5 naapertorlugu suliarineqassapput, soorlu aktiatut taarsikkatut piffissami tassani aamma pisiarineqarnerani akiatut naleqartillugit.

*Imm. 2.* Aktiat ingerlatsivimmi aningaasaliissuteqartumiittut tunniunneqarsimasutut isigineqassapput imaattoqarpat akileraaruteqartartoq aktianit ingerlatsivimmi tiguisumiittunik allaanerusumik akilerneqarpat.

## **Kapitali 7**

### *Nunasineq aamma avalanneq*

#### *Nunasineq*

**§ 21.** Inuk Kalaallit Nunaanut akileraaruteqartartussanngorpat aktiat aamma pissarsiassarisat il.il., niuerutigineqarnerisa nalinginut pissarsiarineqarsimasutut isigineqassapput, piffissaq taanna Kalaallit Nunaanut akileraaruteqartartussatut inissinnera eqqorlugu.

#### *Avalanneq*

*Aktianik børsini nalunaarsorneqarsimasunik aamma aningaasaliissuteqartarnermut peqatigiiffinni uppersaatiniq pigisaqarluni*

**§ 22.** Aktianit aamma aningaasaliissuteqartarnermut peqatigiiffinni uppersaatitit il.il. børsini nalunaarsorneqarsimasunit iluanaarutit aamma annaasaqaatit Inatsisartut Inatsisaanni matumani maleruaqqusanut ilaatinneqartut piviusunngortinneqarsimasutut isigineqarput, akileraaruteqartussaaneq unippat allamik pissuteqartumik akileraaruteqartartup toquneraniunngitsoq, taamaattorli tak. imm. 2 aamma imm. 3, tamatumunnga ilaapput Kalaallit Nunaata aamma naalagaaffiup allap, Danmarkip imaluunniit Savalimmiut akornanni marloriaammik akileraaruteqartussaataitanissaq pinngitsoorniarlugu isumaqatigiisummi aalajangersakkat naapertorlugit Kalaallit Nunaata avataani nunaqavissutut angerlarsimaffeqalerpat.

*Imm. 2.* Maleruaqqusat imm. 1-imiittut taamaallaat atuupput inunnut, piffissami akileraaruteqartussaataitanerup uninnerata nalaani aktianik il.il. børsini nalunaarsorneqarsimasunik niuerutigineqarnerminni 50.000 koruuninik imaluunniit sinnerlugit naleqartunik pigisalinnut.

*Imm. 3.* Maleruaqqusat imm. 1-imiittut atuupput inunnut, aningaasarsianit akileraarutit pillugit Inatsisartut Inatsisaanni § 1, imm. 1, normu 1-2, imm. 4 imaluunniit § 2, imm. 1, normu 10, naapertorlugit akileraaruteqartartuusimasunut. Taamatuttaaq imm. 1-imi maleruaqqusat atuupput aktiat akileraaruteqartartup katissimallugu aapparisaanit pissarsiarineqarsimappata, kiisalu taassuma naggammi siullermi piumasaqaataasut naammassisimappagit.

*Imm. 4.* Iluanaarutit aamma annaasaqaatit imm. 1 naapertorlugu piviusunngortinneqarsimasutut isigineqartut, §§ 11-17 maleruaqqusat naapertorlugu naatsorsorneqassapput, taamaattorli nalingat akileraaruteqartussaanerup uninnerani atuutilissaaq tunniussinermi akiannut taarsiullugu.

*Imm. 5.* Akileraarutigisassatut imm. 4 naapertorlugu naatsorsorneqartoq inaarutaavoq. Taamaattorli akileraarutissaq naatsorsorneqartoq 500 koruuninit annikinneruppat akiligassanngortinneqassanngilaq.

#### *Avalanneq*

*aktianik aamma pissarsiassarisanik nalunaarsorneqarsimannngitsunik pigisaqarlunit*

**§ 23.** Aktianit nalunaarsorneqannngitsunit aamma pissarsiassarisanit iluanaarutit aamma annaasaqaatit Inatsisartut Inatsisaanni matumani maleruaqqusanut ilaatinneqartut piviusunngortinneqarsimasutut isigineqarput, akileraaruteqartussaaneq unippat allamik pissuteqartumik akileraaruteqartarput toquneraniunngitsoq, taamaattorli tak. imm. 2 aamma imm. 3, tamatumunnga ilaapput Kalaallit Nunaata aamma naalagaaffiup allap, Danmarkip imaluunniit Savalimmiut akornanni marloriaammik akileraaruteqartussaataitanissaq pinngitsoorniarlugu isumaqatigiisummi aalajangersakkat naapertorlugit Kalaallit Nunaata avataani angerlarsimaffeqalerpat.

*Imm. 2.* Maleruaqqusat imm. 1-imiittut taamaallaat atuupput inunnut, piffissami akileraaruteqartussaataitanerup uninnerani aktianik aamma pissarsiassarisanit niuerutigineqarnerminni 100.000 koruuninik imaluunniit sinnerlugit naleqartunik pigisalinnut.

*Imm. 3.* Maleruaqqusat imm. 1-imiittut taamaallaat atuupput inunnut, aningaasarsianit akileraarutit pillugit Inatsisartut Inatsisaanni § 1, imm. 1, normu 1-2, imm. 4, imaluunniit § 2, imm. 1, normu 10, naapertorlugit akileraaruteqartartuusimasunut piffissami ataatsimi arlalinniluunniit katillugit ukiuni 7-ini ukiut 10-t kingulliit iluanni akileraaruteqartartussaanerup taamaatinnera sioqqullugu. Tamanna assigalugu maleruaqqusat imm. 1-imiittut aammattaaq atuupput aktiat akileraaruteqartartup katissimallugu aapparisaani pissarsiarineqarsimappata, kiisalu taassuma naggammi siullermi piumasaqaataasut naammassisimappagit.

*Imm. 4.* Iluanaarutit aamma annaasaqaatit imm. 1 naapertorlugu piviusunnigortinneqarsimasutut isigineqartut, §§ 11-17 maleruaqqusat naapertorlugu naatsorsorneqassapput, taamaattorli nalingat akileraaruteqartussaanerup uninnerani atuutilissaaq tunniussinermi akiannut taarsiullugu.

*Imm. 5.* Akileraarutigisassatut imm. 4 naapertorlugu naatsorsorneqartoq inaarutaavoq, taamaattorli tak. § 26, imm. 2. Taamaattorli akileraarutip akilerneqarnissaa kinguartinneqarallarsinnaavoq §§ 24-26-imut maleruaqqusat naapertorlugit imaassimappat iluanaarutit aktianut aamma pissarsiassarisanut nalunaarsorneqarsimanngitsunut tunngappata.

**§ 24.** Inuit qinnuteqaateqarnermik kingorna akileraarummik naatsorsorneqarsimasumik, tak. § 23, imm. 5, kinguartitsinnaapput, akiliinissamut patsisaappat § 23, imm. 1 naapertorlugu akileraaruteqartussaataitanerup uninnera.

*Imm. 2.* Kinguartitsinermut imm. 1 naapertorlugu piumasaqaataavoq avalannermut il.il. ataatillugu nammineerluni nalunaarsuinerup akileraaruseriffimmut tunniunneqarnissaa. Pigisanik nalunaarsuineq § 25 naapertorlugu nammineerluni nalunaarsuinerup ilanngullugu tunniunneqassaaq.

*Imm. 3.* Kinguartitsinermi aningaasat amerlassusiat qaammatit aallartinneri tamaasa 0,3 procentimik ernialersorneqassapput.

*Imm. 4.* Inuk nunamut, 7. decembari 1989-imi nunat avannarliit akornanni suliassat akileraartarnermut tunngasut pillugit ikioqatigiinnissamik isumaqatigiissutigisaannut attuumassuteqanngitsumut, avalappat il.il. imm. 1 naapertorlugu kinguartitsinermut piumasaqaataavoq qularnaveeqqusiisoqarnissaa. Qularnaveeqqusiineq aningaasanut kinguartitsinermi pineqartunut naammaginartumik naleqqutissapput aktiatut, obligationitut niuerfimmi malittarisassaliorneqarsimasumi ilanngunneqarsimasut, aningaaserivimmi qularnaveeqqusiinertut imaluunniit allatut tutsuiginartumik qularnaveeqqusiinikkut akileraaruseriffiup aalajangersagai naapertorlugit tunniunneqassaaq.

Inuup avalannera nunamut, naggammi 1-imi isumaqatigiissummut taaneqartumut attuumassuteqartumut, avalappat tamatumalu kingornatigut nunamut isumaqatigiissummut taaneqartumut attuumassuteqanngitsumut nooqqilluni taava kinguartitsinermut suli piumasaqaataavoq tutsuiginartumik qularnaveeqqusiisoqarnissaa, tak. naggatit 2-at. Inuup nuunna nunamut naggammi 1-imi isumaqatigiissummut taaneqartumut attuumassuteqanngitsumut pisimappat, tamatumalu kingornatigut inuk nunamut, isumaqatigiissummut taaneqartumut attuumassuteqartumut ingerlaqqilluni, taava qularnaveeqqusiineq piumasaqarneq naapertorlugu utertinneqarsinnaalissaaq.



*Imm. 5.* Nammineerluni nalunaarsuineq aamma pigisanik nalunaarsuineq, tak. imm. 2, piffissaq eqqorlugu tunniunneqarsimangippat kinguartitsisinnaanermut pisinnaatitaaffik atorunnaassaaq, kiisalu akileraarut piffissami akileraarutip akilerneqarfissaani akilerneqartussatut isigineqalissaaq, tassa kinguartitsisoqarsimangippat. Akileraarut akileraaruserinermik ingerlatsineq pillugu Inatsisartut Inatsisaanni § 43 naapertorlugu piffissamit tassanngaanniit qaammatit aallartinneri tamaasa ernialersorneqassaaq.

*Imm. 6.* Akileraaruseriffiup kingusinnerpaamik piffissarititaasumik qaangiineq isumakkeersinnaavaa, tak. § 25, imm. 5, tassa nammineerluni nalunaarsuineramik aamma pigisanik nalunaarsuineramik, imm. 2-mi taaneqartutut tunniussinissamut tunngatillugu.

**§ 25.** Kinguartitsigallarnermi pigisanik nalunaarsuisoqassaaq aktiat aamma pissarsiassarisanit inuup taamaatinnermi pigisimasaanut tunngatillugu, tak. § 23, imm. 1. Taamaattorli aktianut aamma pissarsisanut tunngatillugu akileraarut § 23, imm. 5 naapertorlugu akilerneqareersimappat, taakku pigisanut nalunaarsuinermi ilanngunneqassanngillat.

Aningaasat kinguartitaagallartut akilerneqartussanngussapput imm. 2-4-mut maleruaqqusat naapertorlugit.

*Imm. 2.* Aktiat aamma pissarsiassarisanit, pigisat nalunaarsorneqarneranni ilaasut tunniunneqarneranni aningaasat kinguartitaagallartut akilerneqartussanngussapput. Aningaasat kinguartitaagallartut ilaat akilerneqartussanngortut naatsorsorneqassapput aktiat imaluunniit pissarsiassarisat ataasiakkaarlugit. Aningaasat kinguartitaagallartut akilerneqartussanngussapput aktiat ilaat tunineqartut ima amerlatigisut ingerlatsivimmi pineqartumi aktiat katillugit amerlaqatigisimasaattut. Pissarsiassarisat aningaasartaat kinguartitaagallartut akilerneqartussanngussapput pissarsiassarisat tunisat imalluunniit tiguneqartut ilaat ima amerlatigisut pigisanut nalunaarsorneqarsimasunut ilaasut amerlaqatigisimasaattut.

*Imm. 3.* Kinguartinneqarallartut aningaasartaat akilerneqartussanngussapput taamaatinneqarneranniit kingusinnerpaamik ukiut 10-t qaangiuppata.

*Imm. 4.* Inuup toqunerani aktiat aamma pissarsiassarisat, pigisanit nalunaarsuinermi ilanngunneqarsimasut, tamarmik tunniunneqarsimanerattut sanilliunneqassaaq.

*Imm. 5.* Nammineerluni nalunaarsuineq ukiut tamaasa tunniunneqartassaaq aningaasat akiligassat kinguartitaagallartut sinneqarallartillugit. Nammineerluni nalunaarsuineranut nassiunneqarneranut ilutigitillugu piffissami nassiussiffiusumi sumi najugaqarneq ilisimatitsissutigineqartassaaq. Nammineerluni nalunaarsuineq kingusinnerpaamik tunniussivissaaq tassaavoq 1. maaji ukiup aningaasarsiorfiusup naanerata kingornatigut. Nammineerluni nalunaarsuinissamut piffissarititaasooq kingulleq tallimangorneruppat imaluunniit arfininngornerupput, taava nammineerluni nalunaarsuineq sapaammi tulliuuttumi tunniunneqarpat piffissamik eqquinerussaaq. Nammineerluni nalunaarsuineq piffissaq eqqorlugu tunniunneqangippat kinguartitsigallarneq unitsinneqassaaq, kiisalu aningaasat kinguartitsigallarnerup katinneraniittut akilerneqartussanngussapput. Nammineerluni nalunaarsuineramik kingusinnerpaamik tunniussinissamik sivikitsuinnarmik qaangiineq akileraaruseriffiup isumakkeersinnaavaa.

*Imm. 6.* Aningaasat imm. 2-mit 4-mut ilaatinneqartut kingusinnerpaamik akilerneqarnissaat tassaavoq 1. septembari ukiup aningaasarsiorfiusup taamatutaaq ukiup toqukkut qimaguffiusup kingornatigut, piffissaq kingusinnerpaamik akiliiffissaq tassaalluni qaammatip akiliiffissap 20-at. Piffissaq eqqorlugu ulloq akiliiffiususaaq ulluuppat nalliuttoq imaluunniit arfininngorneq, kingusinnerpaamik piffissarititaasoq ulluinnarmut nalinginnaasumut tulliuuttumut kinguartinneqassaaq. Aningaasat akiligassat piffissaq eqqorlugu akilerneqanngippata taava akileraaruserinermik ingerlatsineq pillugu Inatsisartut Inatsisaanni § 43 atuutsinneqassaaq.

*Imm. 7.* Akileraaruseriffiup inuk naammaginantumik piffissalerlugu qinnuigisinnaavaa aningaasat kinguartinneqarallarsimasut, maleruaqqusat imm. 2-mit 5-imut naapertorlugit akilerneqartussaasut pillugit uppersaammik nassiusseqqullugu. Uppersaasat piffissaq eqqorlugu nassiuinneqanngippat kinguartsigallarneq atorunnaassaaq, kiisalu aningaasat kinguartsigallarnermi katinneri akilerneqartussanngussapput. Kingusinnerpaamik tunniussinissamik piffissarititaasumik qaangiineq akileraaruseriffiup isumakkeersinnaavaa. Aningaasanik uniffiup aappaani pineqartunik kingusinnerpaamik akiliinissamut piffissaq tassaavoq akileeqqusilluni piomasaaqammik nassiussinermiit qaammatit aappaat, piffissaq kingusinnerpaamik akiliiffissaq tassaalluni qaammatip akiliiffissap 20-at.

*Imm. 8.* Inuup akileraaruseriffimmut akilersuinermit aningaasat kinguartinneqarallarsimasut ikiliartortissinnaavai. Pigisanit nalunaarsuiffimmi aktiat aamma pissarsiasarisat ilaat naleqquissilluni peerneqarsinnaapput § 25, imm. 2-mi naggatit 3-anni periuseq atorlugu. Inuup nalunaarsinnaavaa aktiat aamma pissarsiasarisat sorliit pigisanit nalunaarsuiffimmiit peerneqartussaasersut.

**§ 26.** Inuit § 24, imm. 1 naapertorlugu kinguartsigallarnissamut akuerineqarsimasut Inatsisartut Inatsisaat manna naapertorlugu akileraartartussanngoppata, taava Akileraaruseriffiup qinnuteqaateqartoqarnerata kingornatigut konto kinguartsigallarnermut tunngasoq atorunnaarsissavaa. Maleruaqqusaq § 21-miittoq atuutissaaq, taamaattorli aktiat aamma pissarsiasarisat pissarsiarneqarneranni nalingat kinguartsigallarnermik aqqissuussinermi ilaatinneqarsimasoq, taanna tassaavoq piffissap nuuffiusup nalaani pissarsiarinninnermi nali taannaasoq.

*Imm. 2.* Akileraaruseriffiup aalajangersarsinnaavaa akiligassat kinguartinneqarallarsimasut aningaasartaat tamarmik imaluunniit ilaat akilerneqartussanngortut imaluunniit pigisat pisarineqarneranni nalingat akileraaruseriffiup naliliinera naapertorlugu appartinneqartoq, imaappat akileraaruseriffiup nalilerlugu piffissami avalassimanerup nalaani aalajangiisoqarsimasoq, tamatumunnga ilanngullugu aningaasarsitsisoqarsimasoq, agguarsitsisoqarsimasoq aamma ingerlatsivimmiit nalinginnaanngitsunik agguassisoqarsimasoq, tamakkulu aktiat nalinginik appartitsisimasut imaluunniit niuernermit nalinginnaanngitsunik allatut iliuuseqartoqarsimasoq. Tamatumani pineqarput agguassinerit il.il. inummut namminermut aamma agguassinerit iliuuseqarnerillu allat pineqartup soqutigisaatut isummersorfigineqarsinnaasut.

*Imm. 3.* Akileraarummik §§ 11-17 aamma § 23, imm. 4-5 naapertorlugit, tassa aktianik aamma pissarsiarisassanik imm. 1-imi ilaatinneqartunut, ilanngaatigineqassaaq akileraarut naalagaaffimmi allami, Danmarkimi aamma Savalimmiuni akilernerqarsimasoq.

## **Kapitali 8**

### *Nalinik aalajangersaaneq pillugu maleruaqqusat*

**§ 27.** Imatut pisoqartillugu aktiat il.il. niuerutigineqarnerminni nalilerneqarnatik taava niuerutiginninnermi naligisinnaasaa aalajangerneqartariaqarpoq.

*Imm. 2.* Naalackersuisut nalinganut naatsorsuinissamut sukumiinerusumik maleruaqqusaliorsinnaapput, tamatumunnga ilanngullugu maleruaqqusanik aalajangersaallutik, tamatuma kingunerisaanik akileraaruteqartartup akileraaruseriffimmit akuerineqarnermi kingorna periutsinik allanik niuerutiginninnermi nalinga naatsorsorsinnaallugu, aammattaaq aalajangersarlugu inuup nalimik naatsorsuinerminut periuseq aalajangersimasoq atoruniuk, taava niuerutigineqarnerani nalingata piffissami kingusinnersumi naatsorsorneqarneranut aammattaaq periuseq taanna atorneqassaaq.

*Imm. 3.* Akileraaruseriffiup, nalgitinneqartoq imm. 3-mi maleruaqqusat naapertorlugit naatsorsorneqarsimasoq, saneqqussinnaavaa aamma missiliuilluni niuerutiginninnermi nalimik aalajangiisinnaalluni, piviusumik pisumi isumaqartoqarpat nalitut naatsorsorneqarsimasoq aktiap niuerutigineqarnerani malunnaateqarluartumik uniuinerussasoq.

## **Kapitali 9**

### *Akileraarutit akilernerqarnerat aamma nammineerluni nalunaarsuineq pillugit maleruaqqusat*

**§ 28.** Akileraaruseriffiup aktianut aamma pissarsiassarisanut inaarutaasumik akileraarutissaq §§ 11-mit 17-imut naapertorlugit naatsorsussavaa, ukiumi pineqartumi iluanaarutit aamma annaasaqaatit tunngavigalugit , kiisalu inaarutaasumik naatsorsuineq ilanngullugu ukiumi pineqartumi aningaasaatinit iluanaarutit akileraarutissaat nassiullugu. Akileraarutissaq naammassineqarsimassaaq kingusinnerpaamik piffissarititaasoq sioqqullugu, tassa akileraaruserinermik ingerlatsineq pillugu Inatsisartut Inatsisaanni § 22, imm. 1-imi aalajangersagaq.

*Imm. 2.* Aningaasaatinit iluanaarutinit akileraarut akilersinneqassaaq akileraaruserinermik ingerlatsineq pillugu Inatsisartut Inatsisaanni § 24, imm. 1-3 maleruaqqusat naapertorlugit.

**§ 29.** Akileraaruteqartartup aningaasarsianit akileraarutit pillugit Inatsisartut Inatsisaanni § 85-imi maleruaqqusat naapertorlugit aningaasaatinit iluanaarutinit akileraarutissaagallartoq akileraaruseriffimmut akilerallarsinnaavaa.

§ 30. Akileraaruseriffiup aningaasarsianit akileraarutit pillugit Inatsisartut Inatsisaanni § 69 naapertorlugu naalagaaffimmut allamut, Danmarkimut imaluunniit Savalimmiunut akileraarutit akilikkat annikillisinneqarnissaat nalunaarutigisinnavaai.

*Nammineerluni nalunaarsuineq pillugu maleruaqqusat*

§ 31. Nammineerluni nalunaarsuineq § 1-imi aamma § 2-mi pissarsiassarisat aamma aktiat pineqartut pillugit akileraaruserinermik ingerlatsineq pillugu Inatsisartut Inatsisaanni § 16 naapertorlugu akileraartartup nammineerluni nalunaarsuineranut ilutigitillugu nassiunneqassaaq.

*Imm. 2.* Inuit nammineerluni nalunaarsuineramik paasissutissanik immersorneqareersumik pissarsisut nammineerluni nalunaarsuineramik suliaqanngitsoorsinnaapput, ukiumoortumik nalunaarummi paasissutissat atorpeqartut imaluunniit kisitsisit ukiumoortumik nalunaarummi allassimasut eqqorpata aamma tamakkersimallutik.

*Aktianik nalunaarsorneqarsimannngitsunik nammineerluni nalunaarsuineq 1. Januar 2020 aallartiffigalugu*

§ 32. Akileraaruteqartartup kingusinnerpaamik 1. januar 2020 nammineerluni nalunaarutigissavai aktiat il.il. nalunaarsorneqanngitsut 1. januaari 2019 pigisani. Nammineerluni nalunaarsuineq immersugassami akileraaruseriffiup suliarisaatigut nalunaarutigineqassaaq. Nammineerluni nalunaarsuiffik kukkunersiuusumit akuerisaasumit uppersarlugu atsiorneqarsimassaaq. Aktiat 1. januaari 2019 niuerutigineqarneranni nalingat tunngavigalu nalunaarutigineqassapput, imaappat niuerutigineqarneranni nalingat uppersaaseqarsinnaanani, taava nalingat § 27 naapertorlugu imaluunniit aalajangersakkat matumani aalajangersarneqartut kingunerisaannik naatsorsorneqassapput.

*Imm. 2.* Nammineerluni nalunaarsuinermi tunngavigineqassaaq ingerlatsivinni 2018-imi ukiumoortumik naatsorsuutit. Ingerlatsiviup ukiumoortumik naatsorsuusiortarfiata qaammatsiutit malinngippagit naatsorsuutit akuerineqarsimasut kingullerpaat atorpeqassapput, imaappat naatsorsuutit taakku kingusinnerpaamik qaammatip aallaqqaataani naggammi 1-imi kingusinnerpaamik piffissarititaasup siornani.

§ 33. Akileraaruseriffiup Inatsisartut Inatsisaat manna naapertorlugu Akileraaruserinermik Aalajangiisartunut maalaarutigineqarsinnaapput Akileraaruserinermik ingerlatsineq pillugu Inatsisartut Inatsisaat naapertorlugu.

**Kapitali 10**

*Pineqaatissiinerit*

**§ 34.** Kinaluunniit pisortanut akileraaruteqanngitsoorniarluni piaaraluneerluni imaluunniit mianersuaalliorujussuarluni eqqunngitsunik imaluunniit paasinerlunneqarsinnaasunik paasissutissanik tunniussisoq inuk akileraartussaataasoq pillugu, imaluunniit akileraarusiinissap aalajangiiffigineqarneranut imaluunniit akileraarutit naatsorsornissaannut atugassanik paasissutissiisoq Kalaallit Nunaanni Pinerluttulerinermi inatsit naapertorlugu pineqaatissinneqassaaq.

*Imm. 2.* Kinaluunniit, naak pissuseq imm. 1-imi pissutsinut attuumassuteqanngikkaluartooq piaaraluneerluni imaluunniit mianersuaalliorujussuarluni piffissaq eqqorlugu, §§ 31-32 naapertorlugit pisussaaffimminik naammassinngitsoq, mianersoqqussummik imaluunniit akiliisitaanermik pillagaassaaq.

*Imm. 3.* Najoqqutassanik Inatsisartut Inatsisaannik tunngaveqarluni maleruaqqusanik saqqummersitsinikkut aalajangersaasoqarsinnaavoq Kalaallit Nunaanni Pinerluttulerinermi inatsimmi maleruaqqusat naapertorlugit pillaammik akiliisitsinermik pineqaatissiisoqarnissaanut.

*Imm. 4.* Inatsisartut Inatsisaanni imaluunniit najoqqutassani Inatsisartut Inatsisaat manna tunngavigalugu saqqummersinneqartuni akiliisitsisoqarnissaanik aalajangersaanissaq pineqarpat, inuk inatsisitigut akisussaasuusoq Kalaallit Nunaanni pinerluttulerinermi inatsimmi maleruaqqusat naapertorlugit pillaammik akiliisussatut pisussaatinneqarsinnaavoq.

*Imm. 5.* Pillaammik akiligassat imm. 1-imit 4-mut naapertorlugit akiligassanngortinneqartut Nunatta Karsiata pissavai.

**§ 35.** Akileraaruseriffik naliliippat unioqqutitsineq pillaammik akiligassinneqarnermit annertunerusumik kinguneqarsinnaanngitsoq, taava Naalakkersuisut imaluunniit Naalakkersuisut taamatut pisussaataata pineqartumut saqqummiussinnaavaa, suliaq eqqartuussitigut suliaassanngortinnagu naammassineqarsinnaasoq, imaappat pineqartoq unioqqutitsinermut pisuunerminik nassuerutiginnissimalluni aamma piareersimalluni piffissap taaneqarsimasup iluani, qinnuteqarneq tunngavigalugu sivitsorneqarsinnaasumi pillaammik akiligassamik taaneqarsimasumik akiliissalluni.

*Imm. 2.* Paasisitsissut imm. 1-imi taaneqartoq pillugu Kalaallit Nunaanni eqqartuussisarnermut inatsimmi unnerluussutip allagartaata imarisai pillugit aalajangersakkat pissuseqataatut atuutissapput.

*Imm. 3.* Pillaammik akiligassaq piffissaq eqqorlugu akilerneqarpat imaluunniit aalajangerneqarnerata kingorna akiliisitsiniarnikkut akilerneqarpat malersueqqittoqassanngilaq.

**§ 36.** Inatsisartut Inatsisaat manna 1. januaari 2019 atuutilerpoq.

*Imm. 2.* Inatsit aningaasaatinut iluanaarutinit akileraarusinermut nalunaarsuinissamut atuutissaaq ukioq aningaasarsiaqarfiusoq 2019 aallartiffigalugu.

*Namminersorlutik Oqartussat, ulloq uu. qqqq 2017.*

/Kim Kielsen

